



# Kattusseqatigiit Partiiat

17. august 2012

UKA 2012/43

Inatsisartut suleriaasiata § 36-ia naapertorlugu matumuuna nassiuppara apeqquteqaat aallaavigalugu oqallinnissamut siunnersuut:

**Apeqquteqaat aallaavigalugu oqallisissiaq: Nunatta erngata tunisassiassatut suli annerusumik, inuiaqatigiinnullu iluaqutaasumik atorluarneqarnissaa pillugu apeqquteqaat aallaavingalungu inatsisartuni oqallinnissamik siunnersuut.**  
(Inatsisartunut ilaasortaq Knud Fleischer Kattusseqatigiit Partiiat).

## **Tungavilersuut:**

Aallaqqaasiullungu Kattusseqatigiit Partiianiit oqaatigissuarput, imeq tassaammat nunarsuatsinni uumassusillit pisariaqartitaasa annerpaat ilaat pingaaruteqartorujussuarlu.

Tassami nunarsuarput imeqanngippat, aamma sunaluunniit uumassusilik piunaviangikkaluarmat.

Taamaattumik Kattusseqatigiit Partiianiit Kalaallit nunarput, imermik minguitsumik kuuinnartumik oqarluanaanarluta nunarsuatsinni annertunerpaamik pingisaqarmat.

Kattusseqatigiit Partiianiit isumaqarpugut, nunatsinniit erngup tunisassiarineqarnerunissaa inuiaqatigiinnut malunnaateqarnerusumik aningaasarsiornikkullu iluanaaruteqarfiunerusumik ingerlanneqarnerunissaa anguniartariaqartoq, tassa pinngortitap tunniussinnaasaa annerusumik suliareqqinneqartariaqanngitsorluunniit maannakkut kuuinnarpoq.

Kattusseqatigiit Partiianiit qularutinginngilarput, erngup nunatsinniit tunisassiassatut atorluarneqarnerulerneratigut, inuiaqatigiinnut aningaasarsiornikkut suliffissaqartitsinikkullu iluaqutaalluarsinnaasoq.

Pinngortitap tunniussinnaasaanik atorluanaanissaq politikkikkut eqqqartorneqartuarpoq, kisianniuna qanoq ililluta piviusunngortitsiniartugut?

Nalunngilarput Nunarsuaq inuttusiartuinnartoq aammalu nunarsuup ilaani imeq assorujussuaq amingaatigineqartoq siunissamilu suli annerusumik amingaatigineqartussaasoq. Taamaattumik Kattusseqatigiit Partiianiit isumaqarpugut nunarsuarmioqatitsinnut ikiorsiijutigaluta aningaasarsiornikkut suliffissaqartitsinikkullu iluaqutaasumik iliuuseqarsinnaasugut.

Soorunami nalunngilarput oqaannarluni iliuuseqarsinnaaneq ajornarsinnaasoq, taamaammat aamma sillimaffigisassagut taasariaqartut arlaqarsinnaapput, soorlu assersuutigalugu imermik saliinermut attuumassuteqartut, erngup inissisimaffissai tankersuit, imermik assartuinissamut tunngasut il.il.

Takorloorneqarsinnaanerluni imermik annertuumik tunisassiorsinnaanermut atatillugu Royal Artic Line-ip umiarsuaatai, tassa inuiaqatigii pigisaat, ilaatigut imaqanngingajallutik Danmarkimut utertartut immikkut ittumik isumaqatigiissuteqarfiginerisigut imermik assartuineq akikinnerusumik ingerlanneqarsinnaannginnersoq ?

Imaluunniit imermik annertunerusumik avammut tunisassiorneq nunatsinni aningaasarsiornikkut pitsaannerusumik suliffissaqartitsiniarnikkullu pitsaannerusumik angusaqarfiussappat, suut allat ingerlatsinermut akikillisaataasinnaappat ? tunisassiortunut tunisassiulerumaartunut, minnerunngitsumillu nunatsinnut iluaqutaasumik ?

Kattusseqatigiit Partiiianiit isumaqarpugut imermik tunisassiornerunissaq innuttaasut peqqissusaannut ulorianartorsiortitsinngitsoq aammalu pinngortitamut avatangiisinullu annerusumik innarliinanilu navianartorsiortitsinngitsoq pimoorunnerullugu piaartumik piviusunngortinniarneqartariaqartoq.

Neriuppungut oqallissaarupput oqallisigilluarneqarumaartoq.